

2030 angutinnagu inuiaqatigiit timersornerunissaat taassumalu piviusunnngortinnissaanut anguniagassanik aaliangiinissaq anguniarlugu, aammalu pilersitsiniarnernut piviusunik pilersaarusiornissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Pilersaarusiassaq suliniutinut ataasiakkaanut aningaasartuutissatut missingersuutinik imaqassaaq, qanorlu aningaasalersorneqassanersut siunnersuutitaqassaaq. Pilersaarusiassaq tamanut saqqummiunneqassaaq aammalu UKA2021-utinnagu Inatsisartunut agguanneqassalluni.

(Inatsisartunut ilaasortaq Malene Vahl Rasmussen, Demokratit)

Akissuteqaat

(Ilinniartitaanermut, Kultureqarnermut Ilageeqarnermullu Naalakkersuisoq)

Siullermeerneqarnera

Inatsisartunut ilaasortap Malene Vahl Rasmussenip Demokratineersup aalajangiiffigisassatut siunnersuummik taamaattumik saqqummiussaqaqarneranut Naalakkersuisut qujapput.

Naalakkersuisut inuiaqatigiit peqqissuunissaasa pingaaruteqarnera miserratigissanngilaat, tamattalu peqqissumik inuuneqarnissarput pillugu siunnersuuteqartoq isumaqatigalugu.

Soorlu siunnersuuteqartup taagaa Kalaallit Nunaanni Timersoqatigiit Kattuffiat nunarsuarmi timitsinnik aalatitsinerpaajunissarput pillugu 2030-mut anguniagassatut takorluugaqarpoq taannalu tunngavigalugu periusissamik aallartitsisimavoq.

Naalakkersuisut kattuffiup takorluuinera tapersorsorpaat, peqqinnissakkullu siuarsaasoqarnissaanut aamma pinaveersaartitsinermik suliaqarnermut tunngatillugu suliassaqaqarfiit assigiinngitsut suleqatigiinnissaannut Inuuneritta III-mi ataatsimut sammiveqarnissamut nalerassaqaqlutik. Nalerassat sisamaasut tassaapput; eqqarsartaatsikkut peqqissuunissaq, peqqissuulluni inuunermik aallartitsinissaq, peqqissuulluni piumassuseqaqlunilu meeraanissaq kiisalu meeqqanut tamanut peroriartornikkut pitsaasumik atugaqarnissaq. Nalerarinqartussani suliassat pingaarutillit suliassaapput, soorlu assersuutigalugit ilaquuttat qanimullu attaveqarfigisartakkat aamma sammisassaqaqtitsiviit pingaarutillit, soorlu meeqqat atuarfii timersoqatigiiffiillu.

Kalaallit Nunaanni Timersoqatigiit Kattuffiata 2020-2023-mut periusissaa suliniuteqarfissanik pingaartitanik sisamanik imaqarpoq, taakkualu tamarmik 2030-mut takorluukkamut tunngaviliinissamik pilersitseqataassapput. Periusissami ilaatigut nassuiarneqarpoq kattuffik meeqqanut meeqqat atuarfianniittunut aamma ulluunerani paaqqinnittarfinniittunut ulluinnarni timikkut aalatitsinerulernissaq pillugu suleqataarusuttoq, naalungiarsuunermiillu inuunerminnut pissusissamisoortutut ilaalernissaa qulakkeerinneqataaffigalugu. Tamatuma saniatigut piumassutsimik suliaqartarnerup nukittorsarnissaa, annerusumik

allanngorarnerusumillu sammisassanik ineriartortitsisoqarnissaa kiisalu atortut sammisassanik siuarsaaffiusut immikkut sammineqarput. Naalakkersuisut kattuffiup periusissaanut imatut taaguutilimmut "Periusissaq 2023 – Nuna ataatsimoorussamik anguniagalik" innersuussuteqarput.

Timersornermut suliassaqarfimmi siusissukkut pinaveersaartitsiffiusumillu suliniutit kivitsiffiginissaat siunertaralugu timersornermut timigissarnermullu tapiissutit 2019-imi ilaneqarput. Tapiissutit ilaneqarnerat Kalaallit Nunaanni Timersoqatigiit Kattuffianut atortussanngortitassat tunngavigalugit kattuffik takorluukkanut periusissamullu sulinermik aallartitsisimavoq.

Suliniutit aallartinneqareersut siuliani taaneqartut saniatigut timersortarfiit aserfallatsaaliornissaannut aningaasanut inatsimmi aningaasanik immikkoortitsisoqarsimavoq, taakkulu timersortarfinnit imminut pigisunit kommuninillu pigineqartunit atorluarneqarput. Ukiuni pingasuni kingullerni timersortarfiit aserfallatsaaliornissaannut Naalakkersuisut 10 mio. kr.-nit sinnerlugit tapiissuteqarsimapput.

Kalaallit Nunaanni Timersoqatigiit Kattuffiat Kalaallit Nunaata timersornermut timigissarnermullu aaqqissuussanut pisortatigoortumik sinniisorivaat. Naalakkersuisut aamma Kalaallit Nunaanni Timersoqatigiit Kattuffiat angusassat pillugit isumaqatigiissuteqarnikkut timersornerup timigissartarnerullu ineriartortitsiffiunissaannut suleqatigiipput, tassanilu sammineqartussanut illuatungeriit naatsorsuutigisaannut erseqqinnerusumik sammisassat imaritinneqartussallu aalajangersaaffiginissaat siunertaavoq.

Naalakkersuisut siuliani taaneqareersutut innuttaasut peqqissuullutik inuuneqarnissaat pingaartitaraat. Taamaammat aningaasanut inatsit aamma angusassat pillugit isumaqatigiissut aqqutigalugit tapiissuteqartuarnikkut Kalaallit Nunaanni Timersoqatigiit Kattuffiata anguniagaqarluni anguniagaanut Naalakkersuisut tapersersuiniarput.

Kalaallit Nunaanni Timersoqatigiit Kattuffiata periusissaa aallarereersoq kiisalu Inuuneritta III, Naalakkersuisut meeqqat inuunerissut pillugit periusissaannut 2020-2030-mut suleqatigiinnissaq tunngavigalugit innuttaasuni timikkut aalatitsinerulernissaq pillugu allanik iliuusissatut pilersaarusiornissaq pisariaqartutut Naalakkersuisut isiginngilaat.

Naalakkersuisut taamatut oqaaseqarlutik siunnersuut itigartinneqassasoq inassutigaat.